

**GOVOR U POVODU DODJELE POČASNOG DOKTORATA Nj. E.
TUN DR MAHATIRU BIN MOHAMADU - BIVŠEM PREMIJERU
MALEZIJE**

Prof. dr. Faruk Čaklovića, rektor

**VAŠA EKSELENCIJO, TUN DR MAHATIR BIN MOHAMAD
VAŠE EKSELENCIJE,
GOSPODINE MINISTRE CIKOTIĆU,
DRŽAVNI, FEDERALNI, KANTONALNI ZVANIČNICI,
UVAŽENE EMINENCIJE,
SENATORI,
DEKANI,
PROFESORI,
DRAGI STUDENTI,
DAME I GOSPODO,**

Želim Vam dobar dan i prijatne trenutke na današnjoj svečanosti,

Velika mi je čast da u ime svih profesora, saradnika, zaposlenika i studenata Univerziteta u Sarajevu, i u svoje lično ime, mogu poželjeti dobrodošlicu njegovoj ekselenciji TUN DR MAHATIRU BIN MOHAMADU, bivšem premijeru Malezije, njegovoj supruzi Tun Dr Siti Hasmah Mohd Ali, članovima delegacije i svima vama koji ste došli da uveličate današnju svečanost.

Dobro došli na najstariji Univerzitet u Bosni i Hercegovini čiji korijeni akademizma sežu u daleko 14. stoljeće. Zapravo, naš zvanični početak nastavno-naučnog rada na Univerzitetu vezan je za 1949. godinu. Osnivanje Univerziteta u Sarajevu predstavljalo je svjedočanstvo opće društvene i kulturne emancipacije Bosne i Hercegovine i jednu veoma bitnu konstantu njene državnosti i njenog razvoja.

U sastavu Univerziteta u Sarajevu danas se nalazi 20 fakulteta, 3 akademije, 4 instituta, 4 univerzitetska centra, Nacionalna i univerzitetska biblioteka Bosne i Hercegovine i Studentski parlament Univerziteta u Sarajevu.

Fakultet islamskih nauka je pridružena članica, a ove godine se očekuje i pridruživanje i Katoličkog bogoslovnog fakulteta. Danas na

Univerzitetu studira oko 40.000 studenata, a u nastavnom procesu učestvuju 1302 nastavnika i saradnika i 900 administrativnih radnika.

I u najtežem vremenu, periodu agresije 1992-1995, odnosno tokom 1479 dana opsade i grada i Univerziteta, profesori, saradnici i studenti nisu prestajali sa radom. Žrtva agresije, Univerzitet u Sarajevu, se uzdigao do heroja odbrane akademskog dostojanstva i svoje duhovne i društvene misije. U tom periodu Univerzitet je napustilo oko 900 profesora i uposlenika. Ubijena su 143 studenta, 53 profesora i saradnika i 61 radnik.

Uprkos strašnom ratu, Univerzitet u Sarajevu je ostao u višenacionalnom sastavu i po nastavnoj i po studentskoj strukturi, na što smo izuzetno ponosni, a što je dio naše kulture i višestoljetne tradicije.

Poslije Dejtonskog mirovnog sporazuma prihvatili smo sve izazove i obaveze koje proizilaze iz Bolonjske deklaracije i ugradili ih u naš sistem visokog obrazovanja. To predstavlja direktnu podršku akademske zajednice Bosni i Hercegovini u njenom bržem pridruživanju Evropskoj uniji.

Na Univerzitetu je do sada diplomiralo 140.000 studenata, 4.128 magistriralo i na čast doktora nauka promoviran je 2.401 kandidat iz 44 naučne oblasti. Publikovali smo više hiljada udžbenika, knjiga i časopisa, naučnih radova i realizirali više hiljada međunarodnih i domaćih naučnih projekata.

Do sada smo potpisali 92 ugovora o međunarodnoj saradnji sa prestižnim univerzitetima gotovo sa svih kontinenata, a sa univerzitetima iz Malezije potpisana su 4 sporazuma: Univerzitet Limkokwing - Kuala Lumpur (Limkokwing University of Creative technology), Univerzitet Sains Malaysia – Penang (University Sains Malaysia), Univerzitet nacionalne odbrane Malezije (National Defense University of Malaysia) i Nacionalni univerzitet Malezije (University Kebangsaan Malaysia)

Posebna je čast i zadovoljstvo da je kandidat za počasnog doktora Univerziteta u Sarajevu, NJ. E. TUN Dr MAHATIR BIN MOHAMAD, ličnost koja u svjetskim razmjerama obilježava jednog od najuspješnijih lidera modernog vremena, koji je u svom premijerskom mandatu Maleziju, zemlju Dalekog Istoka, iz velike privredne zaostalosti uveo među najrazvijenije zemlje svijeta. Upravo u tom

periodu, a i kasnije, vodili ste odlučnu i snažnu kampanju za progres, mir i blagostanje u svijetu.

Ekselencijo, Vi dolazite iz zemlje koja je u najtežem historijskom periodu za Bosnu i Hercegovinu i njen opstanak, bila njen odani prijatelj, pun razumijevanja za bol i patnju Bosanaca i Hercegovaca.

Upravo u tom periodu Malezija je prihvatila više stotina bosanskohercegovačkih studenata dodiplomskog i postdiplomskog studija, omogućivši im besplatno školovanje i smještaj.

Ti stručnjaci danas se nalaze na veoma značajnim profesionalnim mjestima i stečeno znanje direktno ugrađuju u razvoj bosanskohercegovačkog društva, uvodeći ga u razvijeni i moderni svijet.

Također želimo da podsjetimo da nas je prijateljska Malezija snažno i bezrezervno pomagala i u izgradnji razrušene Bosne i Hercegovine, što ostaje u trajnoj memoriji i iskrenoj zahvalnosti naših građana.

Za Univerzitet u Sarajevu i Bosnu i Hercegovinu je veoma važna suradnja sa prijateljskom Malezijom, koja duži period na međunarodnoj političkoj i ekonomskoj sceni predstavlja značajnu podršku demokratizaciji, stabilnosti, progresu i miru u svijetu.

Na kraju, Vaša ekelencijo, Vama i Vašoj porodici želimo dobro zdravlje i uspjeh u budućem radu, a prijateljskom malezijskom narodu sretnu i sigurnu budućnost.

Hvala Vam!

Sarajevo, 07.04. 2010. godine

Bosna i Hercegovina